

## IZVOD IZ IZVJEŠTAJA DEKANA ZA 2015. GODINU

### I NASTAVA

Nastava na Pravnom fakultetu Univerziteta u Zenici tokom 2015. godine odvijala se kontinuirano na prvom, drugom i trećem ciklusu studija prema rasporedu nastave koji je utvrđen na početku zimskog i ljetnog semestra akademske godine. Tokom 2015. godine nastava na trećem ciklusu studija se kontinuirano odvijala sa domaćim kadrom, ali i velikim brojem gostujućih profesora iz zemlje i inostranstva.

Na Pravnom fakultetu Univerziteta u Zenici u akademskoj 2015/16. godini na prvi ciklus studija upisana su 553 studenta. U prvu godinu dodiplomskog studija u ovoj akademskoj godini upisano je ukupno 208 studenata, drugu godinu je upisalo 127 studenata, treću 125, a četvrtu ukupno 93 studenta.

U ovoj akademskoj godini interes za upis na II ciklus studija Pravnog fakulteta je nešto slabiji u odnosu na prethodne godine. Upisano je ukupno 26 studenata, i to 8 studenata na oblast krivično pravo, 7 studenata na oblast građansko pravo i 11 studenata na oblast državno i međunarodno javno pravo.

U 2015. godini promovirano je 79 diplomanata, završenika prvog ciklusa stečenim zvanjem diplomirani pravnik sa ukupno postignutih 240 ECTS bodova, 8 magistara prava i 8 magistara pravnih nauka. Povelju dekana na Pravnom fakultetu dobili su Ajna Spahić za najbolji uspjeh ostvaren tokom 1. godine studija, Anis Maličbegović za najbolji uspjeh ostvaren tokom 2. godine studija, Belmin Mašić za najbolji uspjeh ostvaren tokom 3. godine studija i Admira Feti, za najbolji uspjeh ostvaren tokom 4. godine. Tokom 2015. godine zvanje doktora pravnih nauka stekao je jedan kandidat, a njegova promocija obaviti će se u 2016. godini. Tokom 2015. godine produžen je rok za magistriranje po starom planu i programu, tako da kandidati koji su upisali magistarski studij po starom nastavnom planu i programu imaju mogućnost da studij okončaju do 31.12.2018. godine.

Na treći ciklus studija, koji je kao prvi na Univerzitetu u Zenici organizovao Pravni fakultet, tokom akademske 2014/2015 godine upisana su 24 studenta koji su nastavili studij tokom 2015. godine. Iako je već konstatovano u prošlogodišnjem izvještaju, važno je napomenuti da 24 studenta koji pohađaju doktorski studij, obzirom na cijenu studija kao i na činjenicu da na većini drugih fakulteta u Bosni i Hercegovini i regionu nije organizovan studij na trećem ciklusu, za nas predstavljaju veliki uspjeh. Nastava na trećem ciklusu se tokom 2015. godine odvijala u posebnoj multimedijalnoj sali u novoj zgradi Pravnog fakulteta. Na trećem ciklusu pored domaćih bili su angažovani i brojni nastavnici sa drugih pravnih fakulteta iz Bosne i Hercegovine i regiona kako bi na što adekvatniji način odgovorili potrebama ovog studija. Koncept dokorskog studija organizovan je tako da se primat daje praktičnim pravnim problemima koji u političkom, privrednom, ekonomskom i društvenom području iziskuju pravnu obradu kroz teorijski i praktični aspekt. Krajem 2015. godine organizovan je okrugli sto iz prava osiguranja tokom kojeg su doktoranti imali priliku napisati i izlagati naučne radove koji će biti objavljeni u Analima, časopisu Pravnog fakulteta.

U 2015. godini imenovan je koordinator za drugi i treći ciklus studija što će znatno olakšati proceduru oko podnošenja i odbrane projekata prijave magistarskog rada i doktorske disertacije, kao i kompletnu organizaciju oko izvođenja nastave i saradnje sa nastavnicima sa drugih fakulteta na drugom i trećem ciklusu. Tokom 2015. godine premještena je i biblioteka Pravnog fakulteta i uspostavljena čitaonica. Svečanost otvaranja novoizgrađenih prostorija (bloka A. i bloka B.) Pravnog i Ekonomskog fakulteta, održana je 05. oktobra 2015. godine. Prelazak u novu zgradu Pravnog fakulteta odvija se postepeno obzirom da zgrada još nije u potpunosti završena, tako da još preostaje preseljenje svih zaposlenika u nove kabinete. Potpuni prelazak u novu zgradu očekuje se početkom ljetnog semestra u akademskoj 2015/2016. godini.

Od 2015. godine uvedena je studentska praksa u NPP, kao nenastavni oblik rada koja podrazumijeva praktičan rad studenata radi sticanja praktičnog znanja i primjene stečenog znanja sa studija u praksi. Studentska praksa uvedena je u okviru silabusa za predmet Upravno pravo II. Naime, u februaru 2015. godine donesena je Uredba Vlade FBiH o uslovima i načinu obavljanja studentske prakse u organima državne službe u FBiH (Službene novine FBiH broj 16/15). Na temelju sporazuma koji Pravni fakultet ima sa Agencijom za državnu službu i pomenute Uredbe Vlade FBiH, studenti IV godine Pravnog

fakulteta će u 2016. godini u okviru predmeta Upravno pravo II pohađati praksu u Agenciji za državnu službu- odjeljenje Zenica. Mogućnost uvođenja studentske prakse treba razmotriti i u okviru drugih predmeta, kao i vrednovanje studentske prakse putem ECTS bodova kao zaseban predmet.

U toku 2015. godine pokrenuta je reforma NPP-a, te je potrebno pri kreiranju ECTS bodova tj. opterećenja za pojedine predmete uzeti u obzir rezultate anketa da bi što više smanjili nesrazmjer između stvarnog i planiranog opterećenja. Posebno treba obratiti pažnju na markirane predmete, te novom preraspodjelom ECTS bodova prilagoditi opterećenje koje studenti iskazuju prema anketama sa novim NPP-om. Pri reformi Nastavnog plana i programa, trebalo bi razmotriti slijedeće mjere:

- a.) Odrediti strukturu ECTS bodova na svim obaveznim i izbornim predmetima
- b.) Preraspodjeliti ECTS bodove među predmetima i
- c.) Preraspodjeliti predmete s jednog semestra na drugi ili s jedne godine na drugu.

Redovno nakon svakog semestra provodi se i anketa o ocjenjivanju nastavnika i saradnika od strane studenata. Na osnovu rezultata tih anketa Pravni fakultet je preduzeo niz mjera u cilju poboljšanja uslova studiranja koje su studenti naznačili u anketama.

Od izuzetne važnosti je veliki broj takmičenja studenata koji su se održala tokom 2015. godine, kao i takmičenja čija se priprema odvijala tokom 2015. godine, a održavat će se u 2016. godini. To su sljedeća takmičenja:

#### **1. VIS PRE-MOOT TAKMIČENJE NA PRAVNOM FAKULTETU UNIVERZITETA U BEOGRADU (20. do 22. marta 2015.)**

Studenti Pravnog fakulteta Univerziteta u Zenici od 20.-22. marta 2015 godine učestvovali su na VIS Pre-moot takmičenju održanom na Pravnom fakultetu Univerziteta u Beogradu. Zerina Spahić, Dino Ahmetović, Vedran Bijelić i Nedim Šehić takmičili su se u konkurenciji od 70 timova iz preko 30 različitih država svijeta u svrhu pripreme za konačno takmičenje u Beču. VIS moot court u Beču sa 300 registrovanih timova iz cijelog svijeta najpretnije je takmičenje studenata prava.

#### **2. VIS MOOT COURT" U BEČU (01. do 05. april 2015. godine)**

Studenti Pravnog fakulteta Univerziteta u Zenici od 25.3.-3.4.2015. godine prvi put su učestvovali na najvećem studentskom takmičenju iz oblasti pravnih nauka pod nazivom "VIS Moot Court" u Beču. Na takmičenju učestvuje 300 timova iz preko 90 zemalja svijeta, a takmičenje je vremenom postalo toliko veliko i važno da se nekoliko sedmica ranije iz istog slučaja organizuje takmičenje u Hong Kongu, kako bi se spriječilo da zbog prevelikog interesa ne bude moguće održati ga u Beču. Studenti Pravnog fakulteta u Zenici Zerina Spahić, Nedim Šehić, Vedran Bijelić i Dino Ahmetović prevođeni prof.dr. Zlatanom Meškićem, takmičili su se u simuliranom arbitražnom postupku protiv Univerziteta u Gentu (Belgija), Univerzitet Cornell (New York, SAD), Univerziteta Griffith (Australija) i Državnog Univerziteta Florida (SAD).

#### **3. REGIONALNA AKADEMSKA SESIJA U ZAGREBU (01. do 05. april 2015.)**

U Zagrebu je od 01. do 05. aprila 2015. održana regionalna sesija za studente pravnih i fakulteta političkih nauka s prostora Zapadnoga Balkana, tačnije iz Srbije, Bosne i Hercegovine i Hrvatske, na kojoj su učestvovali i dvije studentice Pravnoga fakulteta u Zenici - Edna Bašić (apsolventica) i Jeneta Šabić (II). Projekt nosi naziv Model International Criminal Court for the Western Balkan, na kojem su održane radionice, predavanja i aktivnosti, te simulirano suđenje u hipotetičkom predmetu pred stalnim Međunarodnim krivičnim sudom u Den Haagu. Projekt su podržale mnoge međunarodne organizacije poput Kreisau-Initiative Berlin, Schüler Helfen Leben, Open Communication Srbija, Humanity in Action Bosna i Hercegovina i Hermes Communication Hrvatska.

#### **4. IX REGIONALNO MOOT COURT TAKMIČENJE IZ EVROPSKIH LJUDSKIH PRAVA (Herceg Novi, 24. do 27. april 2015.)**

Regionalno moot court takmičenje pred Evropskim sudom za ljudska prava održano je po deveti put od 24 - 27. aprila 2015. u Crnoj Gori na Osnovnome sudu u Herceg Novom. Regionalno moot court

takmičenje pred Evropskim sudom za ljudska prava je prestižni događaj koji se održava jednom godišnje u organizaciji međunarodne nevladine organizacije Civil Rights Defenders (bivši švedski Helsinški komitet za ljudska prava).

Događaj povezuje studente pravnih fakulteta iz regije, odnosno mlade pravnike u regionalnu mrežu budućih zaštitnika ljudskih prava i donositelja odluka, a svoje korijene vuče iz tradicije nordijskoga moot courta, u kojem timovi pravnih fakulteta pred Vijećem sudija Evropskoga suda za ljudska prava učestvuju u simulacijama suđenja zasnovanih na fiktivnim slučajevima kršenja ljudskih prava.

#### **5. ICCMCC TAKMIČENJE U DEN HAAGU (17. do 22. maj 2015.)**

U organizaciji Grotius centra za međunarodne pravne studije Leiden univerziteta, uz podršku Međunarodnog krivičnog suda, od 17. do 22. maja 2015. u Den Haagu je održano prestižno moot court takmičenje studenata prava na Međunarodnom krivičnom sudu – ICCMCC (International Criminal Court Moot Court Competition - <http://iccmoot.com/>). Riječ je o svjetskom takmičenju na koje se pozivaju svi prestižni univerziteti, odnosno pravni fakulteti iz cijeloga svijeta, no, povrh svega, ponajviše oni koji imaju prepoznatljivu tradiciju moot court modela takmičenja studenata prava, za vrijeme njihova studija, i koji njeguju ovu vrstu interaktivne edukacije budućih jurističkih naraštaja. Ove 2015. naš Pravni fakultet prvi put je pozvan na ovo renomirano takmičenje, najveće iz područja međunarodnog krivičnog prava u svijetu. Također, smo jedini Pravni fakultet iz Bosne i Hercegovine koji je ikada u historiji ovoga natjecanja ostvario, dakako svojim zaslugama i prepoznatljivim, ali i pragmatičnim nastavnim planovima i programima, odnosno modelima edukacije studenata, pravo učešća na ovome svjetskom pravničkom događaju. Poznati Grotius centar za međunarodne pravne studije prepoznao je poziciju našega fakulteta u Bosni i Hercegovini, odnosno sve dosadašnje ostvarene rezultate na polju promocije takmičenja studenata u simuliranom suđenju iz različitih pravnih disciplina. Ističemo, između ostaloga, da smo državni prvaci u međunarodnom medijskom pravu za godinu 2013, državni prvaci u evropskim ljudskim pravima za 2014, drugi u Bosni i Hercegovini u oblasti krivičnoga prava za 2013. i 2014. godinu.

#### **6. EU I TI DEBATA (02. do 04. juna 2015.)**

Debatno takmičenje na temu Položaj mladih u BiH i pod pokroviteljstvom EUSR u BiH. Naš univerzitet su predstavljale studentice Arnela Maglić i Jeneta Šabić, članice Debatnog kluba Gorgija i u pratnji doc. dr sc. Spahije Kozlića. Rezultat ovog takmičenja koje je održano u Sarajevu je nagradni studijski boravak u Brisel za kolegicu Jenetu Šabić koje je upriličeno u drugoj polovini juna mjeseca.

#### **7. KVALIFIKACIJE ZA REGIONALNO MOOT COURT TAKMIČENJE IZ EUROPSKIH LJUDSKIH PRAVA FUTURA 2016. U ORGANIZACIJI CIVIL RIGHTS DEFENDERS, ODRŽANO JE NA OPĆINSKOM SUDU U TRAVNIKU, ZA PRAVNE FAKULTETE IZ BOSNE I HERCEGOVINE U MJESECU JULU 2015. GODINE.**

Po prvi put bilježimo situaciju da većina studenata takmičara, njih 4 od ukupno 6 takmičara u timu, dolazi sa II godine studija, što je iznimno važno, s obzirom da se na ovaj način stvara podmladak, odnosno odlična osnova našega fakulteta za buduća regionalna i svjetska intelektualna nadmetanja studenata prava. Osvajamo drugo mjesto u ukupnom poretku. Akademski treneri: mr. sc. Enis Omerović, v. a. i Lejla Zilić, dipl. iur., naša master studentica, alumni mootovac.

#### **8. IV DRŽAVNO MOOT COURT TAKMIČENJE IZ KRIVIČNOG PRAVA I LJUDSKIH PRAVA ZA BOSNU I HERCEGOVINU U ORGANIZACIJI AMERIČKE AMBASADE U BOSNI I HERCEGOVINI I AMERIČKOG MINISTARSTVA PRAVDE.**

Održano je na Jahorini u novembru 2015. Javna rasprava je održana pred sucima Pretresnog i Apelacionog odjeljenja Suda Bosne i Hercegovine iako se radi o simulaciji suđenja pred Evropskim sudom za ljudska prava u Strasbourgu. Osvojeno treće mjesto u ukupnome poretku. Akademski treneri: mr. sc. Enis Omerović, v. a. i Vedran Bijelić, dipl. iur., naš master student, alumni mootovac.

**9. PRIPREME ZA SVJETSKO MOOT COURT TAKMIČENJE IZ MEĐUNARODNOG KRIVIČNOG PRAVA ICCMCC 2016. U DEN HAAGU U ORGANIZACIJI LEIDEN UNIVERZITETA, DEN HAAG CAMPUS, I MEĐUNARODNOG KRIVIČNOG SUDA /ICC/.**

Usmena rasprava za 65 timova s pravnih fakulteta iz cijeloga svijeta biće održana u Den Haagu, od 22. do 27. maja 2016. na Pravnom fakultetu Leiden Univerziteta. U toku je istraživanje i pisanje memorijala, odn. podnesaka koji se imaju poslati Organizatorima do 25. februara, nakon toga slijedi aktivan rad na pripremanju usmenih izlaganja. Učestvuje pet studenata /3 govornika i 2 istraživača/ našega fakulteta sa starijih godina studija. Glavni akademski trener: mr. sc. Enis Omerović, v. a., pomoćni trener: ass. Edina Čehajić, dipl. iur.

**10. PRIPREME ZA SVJETSKO MOOT COURT TAKMIČENJE IZ MEĐUNARODNOG TRGOVAČKOG I ARBITRAŽNOG PRAVA U MARTU 2016. GODINE U BEČU U ORGANIZACIJI WILLEM C INTERNATIONAL COMMERCIAL ARBITRATION MOOT.**

U toku je istraživanje i pisanje podnesaka za obje strane u arbitražnom sporu, nakon čega slijedi priprema studenata za oralne prezentacije. Tim čine četvero studenata /dva za procesni, dva za materijalni dio/ sa našeg fakulteta sa master studija i viših godina dodiplomskog studija. Glavni akademski trener: prof.dr.sc. Zlatan Meškić, pomoćni treneri: mr.sc. Ivana Grubešić i mr.sc. Dženana Radončić.

## **II IZDAVAČKA DJELATNOST**

U godini 2015. časopis Anali Pravnog fakulteta Univerziteta u Zenici doživio je određene izmjene, te je doc.dr. Maša Alijević preuzela ulogu glavnog koordinatora kako u procesu nastanka tako i štampe samog časopisa. Trenutno se u štampi nalazi petnaesti broj, a odmah nakon njega će uslijediti i šesnaesti broj. Kašnjenje a objavom je zatečeno stanje i nije povezano sa izmjenom nadležne osobe. Časopis je dostupan u online formi u dvije međunarodne baze podataka „EBSCOhost“ i „CEOOL“ (Central and Eastern European Online Library), kao i u punom tekstu na websajtu [www.prf.unze.ba](http://www.prf.unze.ba). Kao budući cilj je postavljeno približavanje SCOPUS, HeinOnline ili sličnim bazama podataka, ali za takav zahtjev je nužno da bude ispunjeno još nekoliko preduslova. U 2016. godini planiran je zahtjev za uključanje u HeinOnline bazu podataka. U 2016. godini očekuje se uključanje Anala Pravnog fakulteta u hrvatsku bazu podataka „Hrčak“, što će biti obezbijeđeno iz projekta SEELS Mreže Pravnih fakulteta. Nastavljen je pozitivni razvoj objave članaka od strane magistranata Pravnog fakulteta Univerziteta u Zenici. U ovom broju polaznica magistarskog studija Anja Laštro, uspješno je prošla recenzentski postupak i njen rad biće objavljen kao stručni rad. Osim toga, nastavlja se rad na časopisu See Law Journal, u čijem izdavaštvu učestvuje kao član Mreže SEELS i Pravni fakultet Univerziteta u Zenici. U skladu sa izmjenama napravljenim u časopisu Anali Pravnog fakulteta Univerziteta u Zenici, ovdje je novi član uredništva doc.dr. Maša Alijević umjesto prof.dr. Zlatana Meškića. Time se želi ostvariti i novi kvalitet u radu i bolja raspoređenost osoblja u različitim projektima fakulteta. Treba podsjetiti da Pravni fakultet Univerziteta u Zenici učestvuje i u uređivačkom odboru časopisa Univerziteta Burch u Sarajevu, koji se između ostalog nalazi u HeinOnline bazi podataka.

## **III NAUČNE KONFERENCIJE**

Pravni fakultet Univerziteta u Zenici bio je domaćin 12. regionalnoj konferenciji pod nazivom "Private International Law on Stage - National, European and International Perspectives". U konferenciji je učestvovalo 50 učesnika iz država regiona uključujući i Tursku, Bugarsku, Grčku, Albaniju, Njemačku, Holandiju i SAD. Ova konferencija je svojim obimom najveća koju je Pravni fakultet u Zenici organizovao do sada, a ocijenjena je velikim uspjehom kako u naučnom tako i u organizacionom smislu. Od izlagača na skupu mogu se izdvojiti Hans Van Loon (bivši generalni sekretar Haške konferencije za međunarodno privatno pravo), prof. Ronald Brand (Univerzitet u Pitsburgu, SAD), prof.dr. Dennis Solomon, dekan Pravnog fakulteta u Passau (Njemačka), dr. Christa Jessel-Holst (Max Planck Institut za međunarodno privatno pravo, Hamburg) i prof.dr. Anatol Dutta (Univerzitet u Regensburgu, Njemačka).

Predsjednik organizacionog odbora skupa bio je prof. dr. Zlatan Meškić, (Pravni fakultet u Zenici), a skup je organizovan uz podršku Njemačke organizacije za međunarodnu saradnju (GIZ). Konferencija je svojim kvalitetom ali i budžetom premašila sve dosadašnje konferencije, a sa GIZ-om je imala izvrsnog partnera u organizaciji. Ispred Pravnog fakulteta u organizaciji su pomagale mr.sc. Dženana Radončić i mr.sc. Ivana Grubešić.

U saradnji sa Njemačkom fondacijom za međunarodnu saradnju dana 27. i 28. novembra, održan je Okrugli sto doktoranata Pravnog fakulteta Univerziteta u Zenici na temu "Pravo osiguranja". Doktoranti Pravnog fakulteta prezentovali su svoje radove pred prof.dr. Marijom Karanikić-Mirić (Pravni fakultet u Beogradu), prof.dr. Slavkom Đorđevićem (Pravni fakultet u Kragujevcu) i doc.dr. Nataša Petrović Tomić (Pravni fakultet u Beogradu) kao ekspertima iz prava osiguranja podržanim od strane IRZ-a. Predstavnici Pravnog fakulteta u Zenici bili su prof.dr. Enes Bikić, dekan Pravnog fakulteta u Zenici i prof.dr. Zlatan Meškić, prodekan Pravnog fakulteta u Zenici. Radovi doktoranata koji su prethodno pozitivno ocijenjeni u anonimnom recenzentskom postupku biće objavljeni u časopisu Anali Pravnog fakulteta Univerziteta u Zenici. Na ovaj način se nastavlja saradnja između Pravnog fakulteta u Zenici i IRZ-a u oblasti prava osiguranja.

#### **IV MAGISTARSKI I DOKTORSKI STUDIJI**

Za magistarski studij obezbjeđen je kvalitetan nastavnički tim koji treba osigurati buduća kvalitetna mentorstva i članstva u komisijama, a time i kvalitetnije magistarske radove. Među studentima postdiplomskog studija promovisana je ideja objave članaka u Analima Pravnog fakulteta u Zenici kao i učešće na projektima u kojima učestvuje Pravni fakultet u Zenici. Tu se ubraja učešće magistranata Demirela Delića i Lane Šabani na ljetnoj školi na temu „Internal Market Law“ koja se u septembru 2015. godine održavala u Zagrebu u Splitu, uz podršku njemačke organizacije DAAD i Univerziteta u Saarbrueckenu, koji je bio partner SEELS Mreže u ovom projektu. Studenti su osim u nastavi, učestvovali i u simulaciji suđenja po uzoru na postupak prethodnog odlučivanja pred Sudom EU.

Ove godine je ponovo organizovana zajednička prezentacija projekata magistranata pred cjelokupnim i proširenim sastavima katedri. Koordinator procesa bio je doc.dr. Alaudin Brkić. Sama odbrana projekata se pokazala izuzetno uspješnom, iako je bila pravi test za ozbiljnost kandidata, ali i spremnost potencijalnih mentora da svoje obaveze izvrše brzo i efikasno. Iako je time poboljšana priprema kandidata za sam magistrski rad, to se nije odrazilo na efikasnije prijavljivanje magistarskih radove, te je ovo segment u kojem treba pokušati pronaći neke druge mehanizme.

U okviru doktorskog studija doktoranti su počeli sa prijavama projekata tema, a rok za odbranu projekata je kraj februara 2016. godine. Kao koordinator za magistarski i doktorski studija izabrana je doc.dr. Aida Mulalić, koja sada koordiniše cjelokupan proces prijave kako na magistraskom tako i na doktorskome studiju. Pravni fakultet time je na putu ka prvoj prijavi doktorskog rada po bolonjskom sistemu obrazovanja u historiji Univerziteta u Zenici. Očekuje se da će preko 20 kandidata uspješno odbraniti projekt prijave teme a zatim i uspješno prijaviti samu temu doktorskog rada u 2016. godini.

#### **V BIBLIOTEKA**

Biblioteka Pravnog fakulteta u Zenici ove godine konačno je dobila reprezentativan prostor, što uveliko olakšava rad biblioteke. Sada je spojena sa čitaonom, tako da studenti imaju direktan pristup knjigama u prostoru u kojem uče. Veliku dodatnu pogodnost čini opremljenost biblioteke sa dvanaest kompjutera koji će ujedno omogućavati studentima i online pretragu. Kompjuteri su dobiveni iz projekta u kojem je učestvovao Pravni fakultet u Zenici, a projekat je vodio prof.dr. Darko Petković.

U pogledu knjiga veliku donaciju knjiga iz oblasti prava osiguranja, ali i drugih oblasti izvršio je IRZ. Knjige usljed problema sa poštom kasne, iako su već u oktobru 2015. stigle na poštu u Sarajevo. Knjige u 2016. godini obezbijeđene su isključivo iz donacija ili razmjene knjiga.

#### **VI MEĐUNARODNA SARADNJA**

Angažovanje profesionalca iz Njemačke za dobivanje EU projekata, konkretno Manuela Untena, urodilo je plodom, pa je SEELS dobio veoma vrijedan projekat u saradnji sa Univerzitetom u Saarbrueckenom i DAAD-om. U okviru ovog projekta kako nastavničkom osoblju Pravnog fakulteta u

Zenici tako i doktorantima Pravnog fakulteta u Zenici biće pokriveni troškovi boravka i istraživanja na Univerzitetu u Saarbrueckenu u trajanju i do dva mjeseca. Osim toga planirana je ljetna škola za doktorante Pravnog fakulteta u Zenici, te sistem obrazovanja na daljinu u oblasti prava EU.

Predstavnici Univerziteta u Saarbrueckenu kao i svih članice Mreže Pravnih fakulteta Jugoistočne Evrope boravili su tri dana u Zenici u okviru priprema za ljetnu školu iz prava EU održane u septembru 2015. godine u Zagrebu i Splitu. Time je produbljena saradnja između oih institucija, a na Univerzitetu u Saarbrueckenu ove godine su u različitim svojstvima boravili prof.dr. Zlatan Meškić, doc.dr. Aida Mualić i mr.sc. Dženana Radončić.

U svrhu podrške učešća studentima Pravni fakultet u Zenici uspješno je aplicirao za dva projekta FMON, pri čemu je rukovodilac projekta odlaska studenata u Den Haag doc.dr. Nezir Pivić sa mr.sc. Enisom Omerovićem, a rukovodilac projekta za VIS moot je prof.dr. Zlatan Meškić, a u pripremama pomažu mr.sc. Ivana Grubešić i mr.sc. Dženana Radončić. Za VIS moot Court pored toga su od strane američkom CLDP-a obezbjeđena su sredstva za boravak i prevoz studenata u Beču u trajanju od 10 dana. Radi se o projektu koji će trajati još nekoliko godina, što bi trebalo motivisati nastavno i saradničko osoblje, ali i studente, za izgradnjom što kvalitetnijeg tima i što kvalitetnijim radom na ovom takmičenju.

U okviru međunarodne saradnje, treba naglasiti da su održana dva predavanja dr. Stefana Puernera, jedno pred studentima dodiplomskog a drugo pred studentim postdiplomskog studija na temu „Tamna strana njemačkog prava“. Iz ove saradnje nastala je mogućnost učešća jednog studenta dodiplomskog studija na ljetnoj školi u Bonu u Njemačkoj, a tu priliku je zahvaljujući poznavanju njemačkog jezika iskoristio Igor Rimac, student četvrte godine studija, te je imao sedmodnevni boravak i edukaciju u Bonu o trošku IRZ-a.

U okviru saradnje SEELS Mreže i GIZ-a u oktobru ove godine na manifestaciji u Beogradu o izazovima uvođenja notarijata, o trošku SEELS Mreže, učestvovala je doc.dr. Larisa Velić, kao predstavnik Pravnog fakulteta u Zenici.

Veliki uspjeh predstavlja uspješna aplikacija za Jean-Monnet Module iz predmeta „Internal Market and Human Rights in the EU“, koji je zvanično uveden kao izborni predmet na fakultetu. Naime, radi se o prevom Jean Monnet predmetu na Univerzitetu u Zenici, a projekat će trajati tri godine. U okviru predmeta nastaviće se saradnja sa Pravnim fakultetom u Zagrebu, sa kojeg će gostovati nastavnici u okviru predmeta, te Pravnim fakultetom u Saarbrueckenu, gdje će domaći kadar obavljati istraživanje kao pripremu za nastavu i publikaciju koja je planirana u okviru ovog projekta. Vođa projekta i prvi Jean Monnet profesor na Univerzitetu u Zenici je prof.dr. Zlatan Meškić.

## **VII NAUČNO-ISTRAŽIVAČKI RAD OSOBLJA**

Naučno-istraživački rad trenutno je najviše fokusiran na razvoj asistenata i viših asistenata s obzirom da je osiguranje kvalitetnog budućeg nastavnog osoblja prioritet za mlad fakultet kao što je Pravni fakultet u Zenici. U godini 2015. tri asistenta iz zvanja višeg asistenta napredovala su u docenta.

U pogledu naučno-istraživačkog rada osoblja prvo je značajno reći da se još nikada nije desilo da neko od osoblja Pravnog fakulteta u Zenici ne ispunjava uslove za napredovanje, tj. da dobije samo reizbor, nego je uvijek u zakonskom roku napredovalo u više zvanje. Ipak se mora i konstatovati da su trenutni uslovi za napredovanje, osim možda za redovnog profesora, dosta jednostavni, jer ne sadrže specifikacije o časopisima ili bazama u kojima se mora objaviti, niti konkretizaciju u pogledu knjige ili projekta koji se zahtijeva. Ipak, Pravni fakultet u Zenici mora biti spreman za trend koji postoji, da se u Zakone o visokom obrazovanju ubacuju baze podataka kao obavezujuće za napredovanje i utoliko se naučno-istraživački rad osoblja koje čeka napredovanje mora usmjeriti u tom pravcu.

Primjetno je da je daleko najveći broj radova domaćeg osoblja objavljeno u okviru Zbornika radova konferencija, kao i da su knjige objavljene kod izdavača koji nemaju značajan renome. Potrebno je da nastavnici i saradnici prepoznaju viši značaj objave rada u časopisima iz regiona koji su u značajnim bazama podataka poput Anala Pravnog fakulteta u Beogradu, Zbornika radova Pravnog fakulteta u Novom Sadu ili Nišu, Zbornik radova Pravnog fakulteta u Zagrebu, Splitu ili Rijeci, časopisu Pravna misao i slično. To bi svakom od nastavnika ili saradnika trebao biti slijedeći cilj, jer se time osigurava vrijednost objavljenog rada i u slučaju promjene zakona, a i promoviše naučno-istraživački rad Pravnog fakulteta u Zenici. Nastavnici i asistentici jesu učestvovali na većem broju priznatih međunarodnih

konferencija i tu predstavljali Pravni fakultet u Zenici u pravom svjetlu, a u okviru naučno-istraživačkih projekata ostvarena je saradnja sa Centrom za javno pravo u Sarajevu, GIZ-om, IRZ-om, Univerzitetom Burch u Sarajevu i sl.

## VIII OSTALE AKTIVNOSTI

- **PROMOCIJA KNJIGE „NASLJEDNO PRAVO“ (08. januar 2015.)**  
Pravni fakultet Univerziteta u Zenici je bogatiji za još jednu naučnu monografiju. Radi se o knjizi „Nasljedno pravo“ autora prof. dr sc. Enesa Bikića i notara Sefedina Suljevića. Ovaj zajednički teorijsko-praktički pravni projekat rezultat je, prije svega, zahtjeva pravne i šire javnosti za objašnjenjem zakonskih rješenja u oblasti nasljednog prava kako bi se olakšala primjena novousvojenog Zakona o nasljeđivanju u Federaciji BiH koji stupa na snagu 09. januara 2015. godine. Promotori, prof. dr sc. Enes Hašić i prof. dr sc. Zlatan Meškić, u svojim su recenzionim osvrtima ukazali na potrebu harmonizacije u nasljednom pravu, to jest ujednačavanja pravne regulative u oblasti građanskog, u ovom slučaju primarno građanskog privatnog prava.
- **DR. NATAŠA HADŽIMANOVIĆ, MAX PLANCK INSTITUT U HAMBURGU, U POSJETI PRAVNOM FAKULTETU U ZENICI (27. februar 2015.)**  
Dana, 27.02.2015. godine na Pravnom fakultetu Univerziteta u Zenici studentima treće i četvrte godine dodiplomskog studija predavanje je održala Dr. Nataša Hadžimanović, viši naučni saradnik Max Planck instituta za međunarodno i komparativno privatno pravo u Hamburgu. Predavanju na temu Surogat majčinstva prisustvovalo je dvadeset odabranih studenata treće i četvrte godine Pravnog fakulteta u Zenici. Prethodnog dana Dr. Hadžimanović sastala se sa nastavnim i saradničkim osobljem fakulteta kako bi predstavila mogućnost dobivanja istraživačkih stipendija na Max Planck institutu u Hamburgu i potvrdila interes za nastavkom saradnje ove dvije ustanove.
- **PREDAVANJE SERGEA BRAMMERTZA NA PRAVNOM FAKULTETU (17. mart 2015.)**  
Glavni tužilac Haškog tribunala Serge Brammertz 17. marta 2015. godine održao je javno predavanje na temu: "Savremeni izazovi u vođenju istraga i provođenju postupaka za međunarodne zločine". Predavanje je održano na Pravnom fakultetu Univerziteta u Zenici, a pored studenata prisustvovali su i predstavnici zakonodavne i izvršne vlasti, te predstavnici sudova i tužilaštava u Zenici, ZDK i Federaciji BiH. Serge Brammertz je napomenuo da su studenti ovog fakulteta bili u posjeti Tribunalu u aprilu prošle godine, te se zahvalio dekanu Enesu Bikiću na pozivu da održi predavanje u Zenici. Prema riječima gospodina Brammertza, studenti prava tokom svog školovanja izučavaju jednu posebnu oblast izuzetno važnu za Bosnu i Hercegovinu, a to je vladavina prava. Ova oblast je od posebne važnosti, jer od vladavine prava i nezavisnog sistema pravosuđa zavisi budućnost svake zemlje, pa i BiH.
- **AKCIONI PLAN AGENCIJE ZA DRŽAVNU SLUŽBU FBIH I PRAVNOG FAKULTETA UNZE (30. do 31. mart 2015.) (16. do 19. novembar 2015.)**  
U okviru Akcionog plana saradnje sa Agencijom za državnu službu FBIH realiziran je dio aktivnosti predviđenih Memorandumom o saradnji između ADS-a i Pravnog fakulteta Univerziteta u Zenici za 2015. godinu. Studenti/ice četvrte godine organizovano su u periodu od 30.-31. marta 2015. i od 16.-19. novembra 2015. godine posjetili ADS gdje ih je pomoćnica direktora u odjeljenju ADS za Zeničko-dobojski i Srednjobosanski kanton gđa. Vesna Popov upoznala sa organizacijom i nadležnostima iste. Tokom mjeseca oktobra i novembra 2015. godine 9 studenata/ica IV godine su prisustvovali obukama koje Agencija za državnu službu organizuje za državne službenike. Posjete Agenciji i pristvo obukama je organizovana uz koordinaciju doc.dr.sc. Maše Alijević.
- **JAVNA TRIBINA: TREĆI STUB ARHUŠKE KONVENCIJE - PRISTUP PRAVDI (Zenica, 16. april 2015. godine) zajedno sa Eko forumom Zenica.**  
Učešće na ovoj javnoj tribini uzeli su prof. dr. sc. Dževad Drino i doc. dr. sc. Spahija Kozlić.

- GOSTUJUĆE PREDAVANJE dr. Stefana Pürnera na temu: „Tamna strana njemačkog prava – građansko pravo u nacionalnom socijalizmu“ (Zenica, 09. juni 2015. godine).

- JAVNO PREDAVANJE u saradnji sa Organizacijom za sigurnost i saradnju u Evropi (OSCE), (29. oktobar 2015. godine).

Na Pravnom fakultetu održano je javno predavanje pod naslovom ‘Procesuiranje predmeta ratnih zločina u Bosni i Hercegovini’. O ovoj temi je govorio Edo Sujoldžić, pravni savjetnik u Misiji OSCE-a u BiH. Poseban akcenat tokom ovog javnog predavanja je dat na sljedeće oblasti: Organizacija pravosudnog sistema u Bosni i Hercegovini, Zakonski okvir za procesuiranje predmeta ratnih zločina, Provođenje krivičnog postupka/uloga tužioca, Sistem podrške svjedocima/žrtvama ratnih zločina i mjere zaštite svjedoka, Aktivnosti Misije OSCE u Bosni i Hercegovini. Predavanje je prvenstveno namijenjeno studentima III i IV godine dodiplomskog studija, kao i svim zainteresovanim studentima sa ostalih godina studija, ali i svim našim kolegama nastavnicima i saradnicima.

- PROMOCIJA KNJIGE „Država Bosna i Hercegovina i demokratija“ autora prof. dr. Mirka Pejanovića (16. novembar 2015.)

Na Pravnom fakultetu Univerziteta u Zenici održana je promocija knjige – Država Bosna i Hercegovina i demokratija, autora prof. dr. Mirka Pejanovića, dopisnog člana Akademije nauka i umjetnosti BiH. Promotori knjige su bili prof.dr.sc. Kadrija Hodžić, prof.dr.sc. Enes Bikić i prof.dr.sc. Damir Kukić. Moderator: Jasmin Duvnjak.

**DEKAN**

**Prof. dr. sc. Enes Bikić**